

50 Jahr Networking – en AGAB-Ballade

Dichtet und a de Jubiläumsveranstaltig vom 25. Augschte 2009 in Lenzburg vortreit vom Franz Berger, ehemals Leiter vo de Studie- und Studierendeberoting Basel-Stadt

1 E halbs Johrhundert
get's d'AGAB scho.
Wer kânt no d'Aafäng?
Frog de Heinz derno!
z'Aarau im 68
bin ich siin Praktikant.
Vo ihm als miim Mentor
lehr ich allerhand.

„S'isch viel besser z'Züri,“
sait er, „oder z'Bärn.
Dert hebis Profi,
die teschte gärn.“
Doch Heinz, de Einzelkämpfer,
interessiert mich meh.
Er sait Jo zur AGAB,
de Bruefsberoter tuet's weh.

Nei, s'isch ned Hochmuet,
s'isch kei Spliin:
S'bruucht Spezialischte
für die neu Disziplin.
Taktik vom Che Guevara,
- d'Macht vo de chliine Zahl -,
wirkt am Verschwörertreff
vo Basel als Signal.

Kompetenz und Muet
schweisst d'AGAB zäme.
D'Hochschulbildigsoffensive
Git ihre de Pfupf im Ränne. -
[Refrain:] Hüt git's nur ei Wunsch,
wo prägt miin Gsang:
S'gäb die AGAB no
e halbs Johrhundert lang.

2 D'Pionier vo der AGAB:
Waisch no? Rinaldo,
Vincent, Urs, Werner,
Liselott, Hugo.
D'Hermine und d'Carmen,
Uwe und Fred W.,
und all die Peter, vo dene get's
e halbi Armee.

Si göhn rasch a d'Arbet,
händ im wildwüchsige Zoo
vo de Uni's akribisch
AAG's uufgno.
Papier wird gsamlet
und in Mäppli gschteckt.
Glii isch de Wunsch
noch ere Dokzentrale gweckt.

Für di ganzi Schwiiz wird
e Studiefüerer lanciert,
mit Uni- und Gymi-Lehrer
über Selektion diskutiert.
Genau wott mers wüsse:
Was isch mit Diagnostik?
Bruucht's d'Bildigsforschig?
Wie guet isch d'Prognostik?

Für d'Berotig vo Studänte
entwirft sie d'Strategie.
Ihri These vo Neuburg
sind wägwiisend gsi. -
[Refrain:] Ihr merkid sicher
s'Motiv für mii Gsang:
d'AGAB muess a d'Säck no
e halbs Johrhundert lang.

3 D'Berotigsmethodik
Wird scharf kritisiert.
Machs VT? Oder GT?
Bisch analytisch fundiert?
Isch das no Berotig?
Oder ned scho Therapie?
S'git Tagige zu allne Methode
bis he zur TZI.

Si plant en eigni Uusbildig,
post-diplom umschriebe.
E Version a de Hochschuel Aargau
isch uf de Schtrecki blibe.
Diskutiert wird uf de Habsburg,
im Emmitaal, am Zürihorn.
S'Produkt het Qualität
ned für geschter, doch für moorn.

D'AGAB wird erwachse
wird strukturiert.
Bisch es A-Mitglied?
Oder als B diskriminiert?
D'Infolüüt klaage,
si schufte doch soo,
und werdidi als Minderheit
ned wichtig gnueng gno.

Bis mer d'Mappe poolt
und um d'Mappe buuhlt
und es Märtmonopol schafft
und niemerts me muuhlt. -
[Refrain:] Wänn das ghöörtsch
Wird's eim ned bang:
D'AGAB gits bestimmt no
e halbs Johrhundert lang!

4 Doch dänn goht's ums Zahle,
d'Kantön schriitid ii.
Alli sölle Mappe ha,
de Bund isch debii.
Me lehrt deichsle und mäerte,
kompromissle und rächne.
S'isch d'Gschäftsfüerig, wo non-stop
für alli muess fächte.

Für Syschtemkritik
sind d'Ziite vorbii.
S'New Management weckt neu
Luscht an Hierarchie.
D'Cheffe rotted sich zäme
zur KSSB.
Um Statistik wird grunge,
doch es goht um viel meh.

D'AGAB spinnt am ne
modärne Informatiksystem,
baschtlet komplexi Datebänk
doch de Chlotz isch s'Problem.
Mit Bättle und Spände
bliibt si wiiter im Takt,
bis si mit dem SVB
die vertrackti Nuss knackt.

De IT-Erfolg
- de Ruben het's groche –
isch mit em Internet
i de AGAB aabroche.
[Refrain:] S'Johrhundert-Jubiläum
- so stoht's im Infoblatt –
findt ime halbe Johrhundert
im Facebook statt!

5 Em e alte Produkt,
vo de AGAB mittreit,
de <perspektive> ,
het mer d'Gfolgschaft verseit.
Was stört, isch ned s'Heftli:
S'goht um Politik.
Für d'AGAB wirds's bedrohlich,
fascht bricht's ihre s'Gnick.

Wie'nes es Netz nur mit Knoote,
wo verbunde sind, git
exischtiert die AGAB
vo de Bindig under Lüüt.
Do git's Panne und Chritz,
s'isch mol faad, mol kreativ.
Doch so isch d'AGAB motiviert und
produktiv.

D'Kantonsdifferenze
cha d'AGAB nid chitte.
S'schlau Uusbildigskonzept
isch jetz au umschritte.
„S'brucht - europawiiit gspannt -
es Orientierigssystem!“
schriibt d'Hermine.
Doch d'AGAB
het e Gwichtsproblem.

Ich muess zugäh, meer entgoht,
wo d'AGAB hüt stoht.
Si wird sech neu erfinde
Wenn mer si loht. -
[Refrain:] Wer weiss, vielleicht läbt jetz
dank miim Gsang
d'AGAB wüerkli no
e halbs Johrhundert lang!